


www.diarioaruba.com
The way business moves!
Diario
Online
 E Matutino di Aruba

Pa cera por lo pronto e episodio Sidney Ponson

Si, mi ta menciona por lo pronto, pasobra a ser menciona cu e episodio Sidney Ponson a termina cu su viahe pa Merca despues di a recobra su libertad.

Mi ta sigur sinembargo cu dia cu e caso bin dilanti, e episodio Sidney Ponson lo ta den noticia atrobe, y despues di esey, ta cera e episodio.

PENSAMENTO CERCA HOPI

Despues di a tene su conferencia di prensa, mi por a tende di hopi hende **"Sidney a haya un les, y awor lo mira otro Sidney"**.

Esaki tambe mi ta kere. Sidney a pasa dianan cera cu nunca mas e lo desea ni pe ni pa ningun otro.

Sidney a sali cu otro pensamiento.

El a sali cu e pensamiento di mehora su comportacion lo mas posibel y despues di loke el a pasa aden, e lo pensa dos biaha prome cu e expresa su mes, prome cu e actua den un of otro situacion cu e haya su mes aden.

Mi ta kere cu di awor en adelante nos lo mira otro Sidney Ponson.

Nos lo mira un Sidney Ponson cu un comportacion cu nos por ta orguyoso di dje.

Mi a admira masha hopi e manera cu el a baha cabez; e manera cu el a presenta su mes na e pueblo; e manera cu el a acepta su error y pidi disculpa na tur hende.

Mi ta sigur tambe cu e opinion na Merca di Sidney su comportacion, tambe lo cambia pasobra awor tur hende lo mira otro personahe.

Tambe mi ta sigur cu na Aruba, despues di e presentacion di Sidney den VIP Room na aeropuerto, Sidney a haya fanaticonan cu anteriormente e no tabata tin.

Esaki mi ta bisa basa riba expresionnan cu mi a tende despues.

Sidney, Good Luck y Aruba ta pendiente di cada paso di bo, riba tereno y for di tereno. Mi ta sigur cu Aruba awor ta mas cu bo cu nunca.

E OTRO EXPRESIONNAN

Tur ora mi mira entrevistanan cu voceronan di ministerio publico, prome cu cuminsa mi sa caba kico e contestanan lo ta: **"Mi no por bisa nada pasobra e ta den fase di investigacion"**.

Nobenta porciento di e entrevistanan aki ta tempo perdi.

"E preso a sali di warda bisti cu carson, camisa y sapato di marca, siendo cu e tabata sin paña den cel. Con el a logra haya e pañanan aki?"

"Esey ta bao di investigacion!"

"E arma cu el a usa pa menaza wachcommandant, normalmente ta cera den dashboard di auto di polis. Con bin e tabata tin esaki den cel, con e por a haya esaki?"

"Esaki ta bao di investigacion".

"Cada patruya ta entrega bon - boek di gasoline na wachcommandant pa control despues di patruya. Con bin un bon yena caba a ser laga den e auto di polis cu e fugitivo a horta?"

"Ministerio publico tin esaki den investigacion".

"Ta tres persona ta traha cada warda, awe ta 10 dia a pasa, y ainda no a caba di investiga pa sa e contestanan?"

"Mi no sa kico a sali afo di e interrogacion nan pasobra nan ta na fiscal pa investigacion".

y asina por sigui haci pregunta y sin haya ningun contesta pasobra **"e contestanan ta bao di investigacion"**.

E REPRESENTANTENAN DI PUEBLO

Despues di Pasco, tur hende tabata papia di e **"ehemplo"** cu Sidney Ponson mester ta, mirando e posicion (internacional) cu e ta ocupa como bigleaguer.

Pero na Aruba, esnan cu mas mester ta **EHEMPLO**, ta nos parlamentarionan y ministronan.

Pa 50 aña caba nos representantenan y mandatarionan ta hungando un politica sushi cu aña tras aña ta wordo critica, pero parce cu nos mes no kier pa esaki cambia.

Parlamentarionan ta bringa, nan ta core auto bao di influencia, nan ta

causa desgracia, nan ta tira otro cu coppie y scotter, nan ta tira otro cu stoel, y nos ta acepta tur esey y pa e eleccion cu ta sigui, ta nan mes nos ta eligi atrobe.

E parlamentarionan (ministronan inclui) ta yama otro tur sorto di nomber, conta redo haci shisheria, sacando tur paña sushi for di tatarabuelo di nan oponente y colga pafo, y nos ta sinta acepta esaki. Politiconan en general ta emiti comunicadonan cu shisheria, rumor falso, insinuacionnan, promesanan falso, y nos ta sinta lesa nan manera ta **"un tayo di nos cuminda preferi ta nos dilanti"**.

Esaki ta pone tambe cu mañan nos ta vota pa nan representa nos atrobe tambe.

Nos ta sinta critica politiconan, parlamentarionan, partidonan, ministronan tur dia y ta nos mes cu ta critica nan ta tapa nan despues di ricibi fabor, y vota pa nan atrobe.

Nos ta mira con nos placa ta ser tira afo, con proyectonan ta ser aproba cu tur sorto di fayó y despues for di nos placa nos mester paga daño y perhuicio.

Nos ta mira con corrupcion administrativo ta tuma lugar, cuanto placa ta desaparece y ta culpa un y tur, y nada di investigacion no ta sali afo tampoco, pasobra un ta tapa pa otro y ta nos leynan mes ta permiti esaki pa pasa y nada por sali afo. Manera custumber, **"ningun hende a haci nada malo"**.

Partidonan politico ta lanta y ta mas Santo cu Papa na Vaticano, pero despues di eleccion, tur nan sermon y predicashi nan ta cambia segun **"Palabra di Politico"**, y nos ta keda asisti na e mes catedral segun color politico, pa despues bisa: **"Tur di nan ta mescos!"**.

KICO VOTADORNAN KIER ANTO ?

Nos a drenta aña di eleccion, votadornan no kier tende palabranan bunita di **"nos Economia esaki"**, **"nos turismo esaya"**, **nos Enseñanza" esaki, nos dit y nos dat."**

Votadornan kier tende ki control tin riba supermercado cu no ta hisa prijs di 9 florin den un siman pa 14 florin.

Votador kier tende cu ta kita e **"roofclausule"** nan; cu gobierno ta paga esnan cu a paga belasting di mas; cu husticia ta pa un y tur y sin clase ni posicion; votador kier tende cu lo investiga **MES ORA** cada denuncia, sin tin cu spera riba mañan pa bay warda di polis ora cu ladron a despacha tur cos caba pa Africa; votador kier tende cu no ta mishi cu su placa, cu aumento y pago di esaki of esaya pa cubri **"ladronia administrativa"**; cu lo percura pa yuda esnan sin cuminda, mes ora cu esaki bira conoci y no tapa bao di capa **"nos ta nos departamento, no ta nos trabao, no tin placa, no tin hende etc."**; pueblo kier tende cu lo kita burocracia gubernamental; pueblo kier tende cu votador ta wordo trata como rey sin distincion di preferencia politico; pueblo kier tende kico bon y positivo lo tin pa cada familia den prome aña caba.

Arubianonan ta sin trabao. Arubianonan ta wordo kita di trabao bao di tur sorto di pretexto, hasta den gobierno. Arubianonan ta biba cu hamber y sed. Pobreza ta birando peor riba nos isla.

Stranheronan ta habri negoshi links en rechts sin emplea arubiano, empresanan stranhero, hotelnan, restaurantnan, pacusnan Abusonan contra pueblo ta tuma lugar den departamentonan gubernamental añanan largo. Ningun politico of ministro ta haci algo contra esaki.

Abusonan ta tuma lugar aña tras aña contra carterá di e pueblo, tur politico, parlamentario y mandatario sa di esaki, pero nada no ta ser haci pa drecha pa e pueblo.

Den politica si un partido propone pa traha un trapi di tera pa cielo, e oposicion ta bin dilanti y critica, pasobra ta un roltrap mester.

E otro lo bisa cu ta un **"lift"** mester traha, y si finalmente mes, pone cabuya di cielo pa tera pa trek otro ariba, tur partido ta keha, grita y critica, pero e pueblo mes lo no tin nada di bisa pasobra **"ta nos ta representa pueblo y tuma decision pa pueblo"**.

E voz di pueblo nunca ta wordo scucha.

E pueblo ta yora, sclama, grita, critica diariamente, miles di cos cu ta pasando aña tras aña, y no bisami cu ningun politico di ayera y awe y di mañan no sa di esaki.

Suerte ta cu na Aruba ainda nos ta ciego, y surdo pesey cos ta keda bira peor pa nos. No ta nos mes kier ?

Juby Naar.